



法藏碎金錄卷第八

光祿大夫太子少傅上柱國澶淵晁迥

圓覺經中所說禪觀法門粲然該備吾今約已隨宜
決擇其一以為入道之權輿威德章中說三種觀門
今取其三觀之初者經云以淨覺心取靜為行由澄
諸念覺識煩動靜慧發生身心客塵從此永滅便能
內發寂靜輕安由寂靜故靜十方世界諸如來心於中顯
現如鏡中像此方便者名奢摩他其次辨音章中說
二十五種清淨定輪今亦取其二十五輪之初者經
云唯取極靜由靜力故永斷煩惱究竟成就不起于



坐便入涅槃此名單修奢摩他子詳二說其理一也
予愛所言不起于坐便入涅槃可以且從此去禪源
都序有云隨時隨處息業養神正是此矣
協用恬愉養天和以適性密扣真寂乘佛理以御心
殊勝法門吾從此入

身居一室安之則具足逍遙身也心住一境安之則
具足禪定心也身心俱安動靜相養冥息法空之坐
優游自得之場今我能然云何不樂

智曉了性真純學澄凝成證應自立此如貫四珠委
細名理分配收攝用爲法要復何以加

儒家之言率性道家之言養神禪家之言修心其理
一也何煩評論

昔魏太祖曹操嘗謂蜀先主劉備曰天下英雄唯使
君與操耳予以爲此乃世間之事也固不足云若有
言天下大達唯君與我此乃出世之事也何以超此
未知有人言之乎

真學之士若能順天和以調息乘佛理以御心亦可
自之曰調御丈夫矣大雄氏則調御法中大調御可
尊之曰大調御丈夫矣

夫能堅固金石之志詳求寶玉之書窮盡天人之理

有此三善可無愧於心矣

有以佛書爲寶
書道書爲玉書

予今於圓覺經普賢章辨音章共采四句凡十六字
合爲一法約已足用文簡理備可卽時而行自以意
求無煩筆解其語云知幻卽離不作方便不起于坐
便入涅槃

羣誣誣而趣死獨熙熙而養生智識之殊天壤斯絕
不可說莫能知莊生至樂之言信乎自得而已

情因事觸未能不動當使情之所動動如電光光卽
時滅動之所應應如谷響響卽時絕動情應觸如斯
而已如斯之善已爲難得若能如蘇迷廬山八風不

動此則卓爾絕倫矣

心歸妙理學西域之無生迹避畏途得南華之至樂
此二殊勝復何加焉

似動不動真人深深之息似用不用如來空空之心
心息相依息調心淨混融純熟名曰精修

真隱之深者身心俱隱身隱之深則人倫不能見其
迹心隱之深則鬼神不能察其意陶然得天和煦然
與道合我願如此孰知之耶

夫達士者不入智籠異羣愚也獨扣道樞知所歸也
窮當益堅勇於拔俗老當益壯勤於行道具四奇節

孰能比方我願師之庶幾踵武

禪源所云隨時隨處息業養神者予因解之云不拘畧刻之多少不擇處所之喧靜但能攝念安心皆是禪功分限

雅善之名雖有百分之一亦勝於無何謂也夫鄭衛之聲曲將終而奏雅猶勝於終不奏雅姦慝之人命將終而言善猶勝於終不言善

一氣散結而為身一靈分宅而為神神身合而為人所起而為事事相續而為世世事無窮紛紜其中種種不可說一一旋成空唯有萬一真智獨能和而

不同

權利是外貪愛若不能墮戒而知止足則不免事有變衰之禍患恩情是內貪愛若不能覺了而求出離則不免身有生化之輪環迷悟兩端有直有枉迷則天壤悟則反掌

天地中萬物人倫中萬情世間中萬事吾以道眼觀之無不知其大槩種種是常何煩分別

吾自諦思黑業殆盡白業增多唯未到無業有覺之深深處若能到此吾道成矣

予自思即今常修三無漏學處得百分之一焉何謂

也奉焚課小法又間日食素德忿宰欲應日損之師
以此爲戒學隨時隨處息業養神以此爲定學得經
論智因以文章爲佛事命筆立言多明觀照之理以
此爲慧學

清曠域逍遙遊外境殊勝避世高士知之華嚴法界
金剛淨土內境殊勝出世大士知之知之行之而能
深入造極者不可及也

諦觀人世體病健勞逸心有憂喜苦樂事有吉凶成
敗相參混然大槩如此若能推理安常亦是達人之
一法耳

夫鯁生不可與議遠圖曲士不可與談大道故予塊
然獨處聊以自娛研味典墳師友聖賢而已

經教中說四大之四色爲四地六根之六入爲六賊
身心爲幻垢附離真性統名曰我其理如此而於此
外悠悠更欲求備如意不亦踈乎不亦過乎

自古聖賢發入菩提心學大調御法成大涅槃果彼
安能說俗安能知嘿然自得而已

經教中所說住心一境名爲具足禪定心予因自言
存心衆妙名爲具足智慧心又有所說繫心一緣以
習定如發箭也發多則中多父父而箭箭不失予因

又言遊心萬法以增慧如分燈也分多則明多又分而燈燈無盡推類適變伊予能然

吾諦觀人心於世法不及於情者大約言萬數於出世法不及於性者又巨萬數噫吾誰與言

自省吾心而有二寡剛而寡欲不由勢利之徑訥而寡辭不接游戲之談介而寡合不須友況之交三者無相妨自便於從道

見在之身慶大耋而康健未來之性願隔生而誠明世智所圖非吾願也

予以罷留局於西臺求退居於上國歸乎舊第松菊

猶存易以隱裝衣冠甚偉挂車不出讀書自娛絕無榮利之心洞究正真之道此唯自得何必人知

予有二不求六自覺名不求虛榮利不求太盈修身自覺輕澄心自覺明調氣自覺清爲文自覺精顧行

自覺平學道自覺生去彼取此莫之與京
人人各有四因緣蓋起於身心事世者也自上三數由於口最下之一則不然何謂也身可使無侵損心可使無惑亂事可使無繫縛此皆由已者也其唯衆

共成世有可安之理則不由已此固無可奈何而三者由已亦罕能自保有之噫人之大迷也如此何必

讀書然後乃知而未嘗見人言及於此

子常內思自壯及老志辭權利懼貽冰炭之懷欲寡私邪免罹鍼艾之苦率由已見不俟他言

列子第七楊朱篇第四葉有注云夫不謀其前不慮其後無戀當今者德之至也予愛其語可以銷憂釋結予當奉持又能不失中正者也

三歸五戒初法其歸出以律四諦六度終濟於曲盡其妙此從方便門漸進修行路

吾嘗究觀人世大情於真稟賦有限光景之中志在求取無窮愛欲之事者萬萬皆然萬中有一自保天

均不致大患者已爲明哲若又能別得悟入之理此則巨萬中或有一人乃希世絕倫者也衆人不可得而知之而此人亦不可得自言之耳

予以觀書得意聊舉三家之所宗孔氏之書云有殺身以成仁無求生以害仁此以名爲宗不顧其身者也老氏之書云名與身孰親此以身爲宗不顧其名者也釋氏之書云妙性圓明離諸名相此以性爲宗不顧其名與身者也源流寔繁難以廣記而備言之

爾

予自引年退居日用有定酒藥隨宜扶衰養疾身心

隨時息緣。反照以經論爲智地。以文章爲佛事。止此四者。餘無所云。

夫學道入理之心。有如翔禽度空而不留跡。又如閒雲出岫而不著物。經教中所說無住法門。無礙法門。其自在也如此。復何疑乎。

處世之道。亞聖鄰於至聖。出世之道。等覺鄰於妙覺。唯變所適。始可與言道已矣。

予退居養老。有清遐高潔之意。恬和適悅之味。殊勝超絕之志。自知而已。

予所見所踐所願。不求名譽福報。若其理有如影響。自應者。抑亦非予所貪也。

予承多士美談。見推清健。自詳內典所說。似得輕安。只此清健。輕安不羨華腴。充盈。

自念退身漸老。脫俗彌殊。無所圖無所拘。不好圍碁。不好呼盧。立法之言。信筆書。服藥之酒。斷餅沾日。得新新經論。智知有孤雄大丈夫。

自覺隨宜真應之兆。久聞靈響。清徹透三靜關。未得心華發明。照十方刹。此善境界。鄰妙吉祥。

吾志在圓覺經。得普眼上根之觀。門行在楞嚴經。得觀音入流之法。要姑務相濟。積習勝緣。

剛健中正予取韋編之言以爲定觀練董修予取貝
典之言以爲慧大槩如此餘自詳求之也

真修法門次第有四智觀道斷志守立行此但開端
詳求在已或該已錄意熟增添

清心釋累予取後漢書息業養神予取禪源序二句
足矣用不必多

身心不動坐圓覺道場權實會歸入法華三昧從吾
所好何必求人

予思壯歲歷官之日嘗見公館之壁上有題詩云猛
風拔大樹其樹根已露上有寄生草青青猶未悟不

審何人之作也因知物理自昔而然先覺形言警戒
多矣

解脫三門見空虛而有覺涅槃一路歸寂滅以無餘
廣說異端無不取也

偉茲靈響發我天機乘妙妙之聞心入如如之成相
欽哉瑞應蔚爲導師

人之多欲三聖同誠周易損卦云懲忿窒欲老子道
經云少私寡欲釋氏涅槃經云離於愛欲垂訓並著

豈合縱心

言行動天地儒教之極致也此法有爲寂照含虛空

佛理之極致也此法無爲二法俱正其用則別人間有畏途內外共二皆速死之地也舉世誣誣然趣之而不能避安知有一路涅槃門乎苟聞斯言大笑者多矣

南史中有說梁時劉歊者幼敏特高長而博學有文才不娶不仕隱居學道忽有老人無因而至謂歊曰君心力堅猛必破死生彈指而去尋之莫知其所予因追思獨斷其理夫人分段之身乃一幻累之蘊耳此人能破之而出所謂有自然智破無名殼超於天人者也豈世網之可嬰乎

孔子學禮辯其俎豆之名品此則典儀之職也孔子養易演其卜筮之象數此則執藝之職也然孔子所學此有用之職乃是體大而不失其正者耳若以妙道超乎形器之上出乎言意之表固不可同日而論也而輒問禮於老聃故老聃荅以他辭形于教誡而孔子遽有猶龍之歎焉是知宣尼主善爲師聞義則服有如此者

子別得一對治之法矣言簡意備可以足用先思已之切於身心次及庶事之不如意者總名爲苦而歷觀甚於已者至多又思已之切於身心次及庶事之

被意欲小
至聖

得如意者總名爲樂而歷觀不及已者亦至多夫如是
是以已方人有何不足

予惜暮年壯心不已所修功德頗異於常作不退輪
銘且志之於已而勿失自警策於胷中作無盡燈頌
又傳之於人而漸多期照耀於天下自覺自利覺他
利他言念此生不爲虛過

南史內有說梁劉歊志行甚高嘗有異人謂歊曰
君心力堅猛必破死生子慨然慕之而志氣雄偉願
超造化抗心希古唯力是視

諦思人倫自凡及聖分爲四種知見夫唯貪所欲都

無覺悟此是凡夫知見超凡有覺層層肖然樂于小法
或沈空住寂此是小乘知見夫傑出此類而不落小
乘二邊獨得中道此是大乘知見雖得中道亦不
相此是上乘知見出此四等之外更有上上乘知見
無不了知不可以量對待爲比而妙覺周圓此是佛
之知見

南華之書有說逍遙遊蓋明大小雖殊而能隨已自
足不越涯分而過貪西域之書有說解脫門蓋明次
第皆空而能見理無著免罹虛幻之所縛誓將乘道
遙遊入解脫門予苟能然豈有不當二教參用有何

相違

士若宿植善根將成勝果練一心之疑寂期吾眼之圓明馭不退輪行無上道有如此者何以加焉

予之引退志本真純三徑就荒願無客到五漿先饋常畏人知自然而然不可致詰

今得自生巧慧事甚近而意甚新夫化導於人猶爲種種方便而況於己豈不能然此邈而忽悟者也自今或值一切不如意事當即時而先覺屹然不動在我而已苟不能然於己

化民成俗之學儒門之事也長生久視之道道門之

事也清心釋累之訓佛門之事也予以此三事爲貴名同而實異者也

今偶得十論一經之中四字各一句采而合之以爲道家心體之四相苟或能然何須廣求入理之法坐忘論云心安而虛南華經云水靜猶明予謂但令心體安虛靜明卽是真人至人爾忽自追省曾作靜深生四妙詞其序具述靜中生四妙謂安虛明樂是也今之所說該涉其四矣且表志趣純深自然暗合故不避重複而書

若有人功名富貴如唐之裴度郭子儀我不愛之若

有人琢磨道德師友造化合于天倫名出世人我愛之重之願以至誠效之

持金剛經者若有人了知住無所住心得無所得法者此名慧業若有人日積課誦之功希求豐報之利者此名福業二者相去絕遠如霄壤矣

周易云知進退存亡而不失其正者其唯聖人乎老子云見素抱樸少私寡欲又云知足不辱知止不殆涅槃經云於世間中得名聖者少欲知足亦名清淨夫如是則三教之書有何相戾勸戒之道有何不同讀書之人何不聽信

寶積經云猶如大龍所作已辨涅槃經云如空野象獨一吾侶予因思之大士智力如大龍獨象奇特超絕也如若望有朋自遠方來不亦難乎

定如壁立不動也慧如珠明圓照也定慧相合體用備矣到此體用何必多談

若有人於世間法中不嬰於網罟不犯於樞斧於出世間法中知出世之道路見入理之門戶如是之人可謂獨步我自思之誰將晤語

予嘗作願成四勝深心偈云豁然悟空了然見性凝然不動寂然無思今又以此四句偈自爲已說用之

爲法要焉。豁然悟空者，照破幻蘊，情累不留，苦惱也。了然見性者，洞曉相續有情，都是一真法界也。凝然不動者，任其外緣所觸，如八風之吹，妙高山也。寂然無思者，如晏海澄湛，絕識浪之騰躍也。四法純熟，其利甚博。

古人古事過去空，今人今事卽今空，未來人事決定空。不悟則已，旣深悟之，豈可於此大虛空幻妄之中，一一執爲有法，執之爲有，則有礙；有礙則有害，視之爲空，則無礙；無礙則無害，以理斷之，何者？爲勝苟不見此理，何以得爲上上智？苟不能以理奪情於己，何

益？又何以得爲大丈夫哉？行之由己，何必求人。

動搖支體，無積滯之氣，融練情性，無結闕之念，修行之要，最爲親切。予今老年所學如此。

儒門中所尊推之曰龍，周易云龍德而隱者也。道門中所尊亦推之曰龍，史記孔子曰老子其猶龍耶。釋門中所尊亦推之曰龍，寶積經中稱述無生大士云：猶如大龍所作已辦，予因思凡諸俊彥，有以人龍、士龍自負者，一何容易哉！

吾今佚老，自謂方知身心世洞，見大空佛道，儒會歸真，理浩然氣暢，但保太和之和，油然心新，當成至樂。

之樂以茲度日豈曰虛生

志於道者必在乎抗心希古雄節邁倫窮當益堅老當益壯脫落儔侶如獨象之絕羣超騰風雲如大龍之辨事意我有此願而世無同人

才智爲佛事文殊之法門也行實爲佛事普賢之法門也聲響爲佛事觀音之法門也求自然智唯變所適吾能獨斷何必諮詢

慧可初師事達摩告其師曰我心不安達摩曰將心來與汝安慧可曰我心不可得達摩曰吾與汝安心訖予謂人之心也若此其身乃是至真至親之處然

亦無物可得況乎虛名至假至踈而乃自矜其有不亦謬哉設有人曰我得好官子當告之曰將官來與汝看彼或曰我官衆緣所成強名曰官亦如數輿無輿不可得取而看之也予當荅曰吾與汝看官訖

予因汎覽諸書又得三種之師尚書云主善爲師夫宏達之士不當止學一先生之言凡有一善皆能師之則其智廣矣又列子云子列子師壺丘子林注云日損之師老子云爲道日損夫人若能知非改過日思減損有去非之善居無過之地乃幾於道也又唐賢白樂天有詩云澹然無他念虛靜是吾師莊子云

唯道集虛老子云歸根曰靜夫人若能虛靜其心則於道最爲親切此三種理有淺深俱爲入道之門故予采而師之

彌陀之淨土法華之化城權教也漸教也金剛之無所住心圓覺之普眼觀門實教也頓教也看內典者當如是解

吾於二教之書各得法要之一老氏之書云深根固蒂此乃長生之法也釋氏之書所云息緣反照此乃無生之法也名相之談不煩多取

予自視所履進退不失其正應儒教之宗旨也動

靜交養其命應道教之宗旨也定慧均適其性應釋教之宗旨也合此三善之法奉今一報之身與衆不同於已有得

三獸濟渡壯獨象之絕流四果超升嘉大龍之辦事甘從曲士見誚迦談

入道之要先戒嗜慾吾口不恣其所嗜得老氏之旨淡乎無味心不恣其所欲得大易之旨寂然不動能戒嗜欲故幾於道

予素愛重唐圭峰禪師宗密所述法要之書尤爲詳備竊心師之久矣天聖八年正月十八日夜忽夢見

一老僧或云此卽密公也予乃再拜稽首自敘宿昔
歸依之志云弟子幼不狎好弄之侶長不學無益之
藝唯於妙道久留深意夙欽禪德願爲門人攜鉢洗
鉢服勤問法而已公亦有答見器之深而不一一記
省其語寤而思之雖知因心成夢固當然歟亦喜妙
事同符斯可見矣

中觀論云因緣所生法識卽是空予自別有語云因
果所成法我說不是空何以故予謂善惡眞妄皆有
報應故不爲空也然而善惡眞妄其理不同夫人心
之根本爲因也心之所起爲緣也所成爲果也當知

惡緣妄緣可以除去有如左氏之語云無使滋蔓蔓
難圖也善緣眞緣可以封植有如白公有詩云前歲
種桃核今歲爲花樹其理決然耳智人宜乎詳擇之
也

自古以駕馭英雄乃威柄之極致莊子之師友造化
在人倫而何如超絕卓然殊非擬議

威儀動止有節身隨宜也收合凝融有敘心隨宜也
飲啗服餌有法物隨宜也詳擇應順有理事隨宜也
我之四隨宜日用人不知

設使絕倫才逸賞之曰天上謫僊人何如出世道高

推之爲法中大調御

凡夫之心動而昏聖人之心靜而明深智之士志於道者詳究此言足用矣

身世二事罕有悟者世有世網之患難身有身蘊之苦厄二俱出離方名解脫

季子觀樂觀諸國之樂知其各有興衰此外事也予之觀音觀獨聞之音知其最爲殊勝此內事也觀音之名亦非無謂

予於世間法本以薄藝自結人主未嘗依權倖而苟進也於世間法亦思以至誠合天道未嘗信巫祝之

妄求也自然而然無助我者

迷人既貪存日虛榮虛利此乃有中之空也又貧歿後虛名虛飾此乃空中之空也皆由自執爲我不悟我是虛妄幻累之根本孰能思之

予覽唐書文苑傳云司空圖退居中條山別墅自稱耐辱居士予因思佛法中有六度而忍辱是其一耐辱卽忍辱之義也夫如是則釋迦文曾爲忍辱僊人司空圖自稱耐辱居士噫言之斯無難唯受辱俾如流是唯難哉經教中謂能忍者名爲有力大人予獨斷其理夫人不能忍者則有惡事發作譬如暴風起

薄。致覆沒能忍之者必得惡事消滅譬如沸湯沃雪不暫停留圖若誠如所稱子謂耐辱居士便是有力大人

學法之要見性居先槩舉大端諦觀可曉佛經云非幻不滅道經云其精甚真難遇至人款談妙理

老莊道與既見其清虛能秀禪宗又知其頓漸晚年真學自顧多然

天時人事物理道樞舉四大端該括盡矣予於四者靡不經心銳意詳求悉見崖略撫已自得豈曰虛生卜此談交罕逢深契

消塵海岳

予讀圓覺經愛普眼觀門理事無礙讀華嚴經愛普賢觀行智力相資若夫優柔而求厭飫而趣是吾心也云誰知之

自思性分稍應佛書引車避仇得須菩提無諍三昧忘言合意入維摩詰不二法門竊冀涓塵積成海岳

是於妙道粗結勝緣

阿珠彈雀荆玉抵鵲外物也人猶惜其所失而况精神內寶也棄而不收過求虛冗之榮利者吾惜之深也禪心之體不可不住不可有住當住乎無所住之住金剛經云應無所住心坐忘論樞翼云不依一物

而心常住是也若住此住安隱深固可以到自覺聖
智境界之處此其大略也至要也

出是非域見莊子之道樞破煩惱賊用維摩之慧劍
與也如此人其謂何

徐寅律賦體格浮華內有可采予亦收之有賦述裨
僊之道約略記其大意明乎道不易致其語有上下
不在天不可以翼翥下不在地不可以身到不在乎
近不可以耳目審不在乎遠不可以驂造又有云在
乎破塵網清心源出嗜欲之千里入希夷之一門予
亦以為然

禮記有云七歲曰悼八十九十曰耄悼與耄雖有罪
而不加刑予今年八十矣因而自思非但不作世間
有刑之罪又欲力學出世間無為之道以此比方怡
然自足

吾老矣自設常用疾力之法譬如金鐵之器可以速
辦湯飲者名曰急須子是也今自約於其四威儀中
不管情境之順違不管畧刻之多少且即時而入至
人無何有之鄉放懷而遊不計近遠又即時而泛如
來大寂滅之海冥神而涉不計淺深量收功用此法
定矣禪源都序云隨時隨處息業養神正是此也所

宜諸演說之煩爾

予以文章爲佛事者自然道心好陳法要非世間之隨順也又以音聲爲佛事者自然靈響暗資法樂非耳外之鏗鏘也言念勝因何求益友

予記得齊已詩句云心清檻底瀟湘月骨冷禪中太華秋又記得似是陳陶詩句云高僧示我真隱心月在中峰葛洪井予愛誦之令人氣格爽拔

夫人生之所值遇者大槩凡有四種焉世運之治亂事理之順違氣質之盛衰情意之苦樂皆有世數而不能出矣唯有大覺力聖人至明至勇鍊成不二性

還源深固者獨能出之予所見如此復與誰言

圓覺經普眼觀門被上根而如來告普眼菩薩言欲求如來淨圓覺心應當正念遠離諸幻先依如來奢摩他行堅持禁戒安處徒衆宴坐靜室予詳真學當從此始夫安處徒衆則非吾事所云堅持禁戒寔資外獎又云宴坐靜室最爲要切維摩經云不於三界現身意是爲宴坐予嘗擬之而言云不令一事礙方寸是爲虛室然而此皆言其臻極之理必未能爾

自思力量且宜從漸雖不及苾芻受具足戒且以嚴持心法檢迹正儀可也雖未能頓虛方寸之地以爲

吉祥之室且虛方丈之室專於靜居可也吾之老年屬意如此

學而欲求外事者唯恐人不知欲求內事者唯恐人知之吾有此言已泄天機

諦觀貪欲有二大患固權寵而觸禍機飾私邪而涉畏途知之善避百無一二古今之大情也如是

自謂暮年急於無學之學不必須俟從容固當隨時抖擻一切塵念冥心絕境便是入至人無何有之鄉泛如來大寂滅之海此但至小至淺者也古德所言之理乃是至大至深者也

服雲母粉不如我自得法門甘露味之妙也聽清商樂不如我獨聞性域天籟音之和也五鼓夢迴聰警甚樂福會靈應超然絕倫

習定如習射射多則中多中多則分寸無失如此則定心熟矣益慧如益燈燈多則明多明多則毫芒必照如此則慧心廣矣非曰狂言悉因經據吾求自然智切問近思唯變所適他皆倣此

儒家之文雅道家之清淨禪家之宴寂吾登耄耋之年彌加樂欲之意自喜性習之天然也如此

左春秋有語曰老將智而耄及之予今年登八旬

而法成文其意無盡常患才多以為增上緣然而年及耄而智日新度越古人亦足自慶即非妄有矜伐也加以壽康給足似續蕃行使我勝修益壯爾予讀楞嚴經知動靜不生之相讀圓覺經見理事無礙之門非止讀經而皆得法

予讀類書有云隋時高潔之士張文詡博覽文籍以灌園為業州郡頻舉皆不應也以其貧素而賑給之又輒辭不受每歎曰老冉冉而將至恐修名之不立予見古人之行如此因而省己夫服勞有養自免學老圃之事賜祿足用豈待致公家之卹年登大耋精

爽不昧慶幸畢集超於先賢固當激勵志節亦加先賢一等今不復修飾更求虛名且歎曰老冉冉而已至惜涉道之未深爾

予自冠及耄好讀書未嘗一日而廢棄亦既大耋尤嗜竺墳酷信所說行之因報如影響不差慨然有挺拔出塵之想猶患誦博而寡要因為四字六句以定積習之法自曉而已其語云知幻識真去邪任正冥心攝念入流聞和不失不勞法要盡矣

人倫有三大苦未見有丁寧形言而戒懼者仕宦之

間觸禍機衽席之上密涉畏途輪環之中枉入諸

趣第一第二之苦可以目覩第三之苦可以心知
若能嚴持至行善避此苦者其唯有智力大人乎
人之所惜愈增愈踈予之所惜愈減愈親智者可以
意取予不能以言陳

離名相精真體用難爲力致不思議解脫境界率由
神會故惟道侶非尚談交

時君御極舊有至言書云任賢勿貳去邪勿疑予因
思之法王御心亦復如是依華嚴經信用普賢依楞
嚴經勿受羣邪是也

天道人事物理動息各有自然時數若能洞曉臻極
而無帶芥於曾中者可推之曰賢哉大丈夫

祿位神物也求者不可得有有者不可得守守者不
可得久所以然者不知其道也抑亦數有定分也

心之所起念念名爲塵垢念之所屬事事名爲夢幻
當如是觀如是斷勿復分別牽纏

大千沙界尚爲空裏之空名鉅萬金錢固是末中之
末事非上上智無了了心

我自得二大觀法門觀一切動植之形來觸目者悉
謂之夢幻觀一切差別之情來觸心者悉謂之魔賊
此二者事類繁細不可件析從無始以來與我爲仇

故非我獨然而人皆然非止於今已往未來無窮亦皆然我知之矣彼來觸我我當觀之令精審而不迷練之令純熟而不動難則至難未必能爾然比夫全不知觀練者則殊矣

我視富貴如秋風之過如浮雲之變視身世如幻化之相如夢想之狀是故我心無所住而住亦不見其無所住之住

吾晚年之學住無所住故不爲住修無所修故不爲修得無所得故不爲得說不可說所以無說是故徑荒交絕介然自守而已

吾嘗諦觀多士求其傑出若乃博聞強記洪筆麗藻學洞天人之際才堪將相之科根器得中或有之矣必要中根以上自然智生知高蹈之大方見還源之妙性超出世表卓然獨存者吾不得而見之矣

莊子外篇有虛緣葆真之說圓覺經普眼章有理事無礙法門予嘗究觀其體一也夫順緣而不失真與應事而不妨理有何差別宏達之士適變會同固當如此若偏執一家之言而意成隔闕者非也

南華之經有所評品謂之蔽蒙之民倒置之民天之戮民予歎士大夫爲何不知此言可愧可畏又西域

之經有所尊獎謂之開士大士無上士爲何不知此
言可貴可愛而但蠢蠢然紛紛然與萬物同化滅欲
夫聖人作易窮神知化窮理盡性此乃數術
之大者也數術雖大而有限量惟世雄妙覺之理不
可以數術窮之獨出限量之外固非偏見孤說用其
勝負者也金剛齊云我不依有住而住不依無住而
住如是而住予因續之以言云我願於造次顛沛之
逆情乖意之時亦不失安然而住
采集內典四句以明已意云宴坐靜室冥神絕境凡
所有相夢幻泡影

道家之言虛無但得其體佛教之言寂然體用兼備
真學之流所宜具此知見分其半滿

清心釋累姑務息緣澄神定靈居常宴坐用之不匱
其如予何

儒書之要仁與義道書之要恬養智佛書之要定生
慧兼而有之廣大悉備

非理外至當如逢虎卽時而避勿恃格獸之勇非理
內起當如探湯卽時而止勿從染指之欲大率如此
不煩具陳

老子云有物混成先天地生此乃釋教所說一真法

界是也周易云精氣爲物遊魂爲變此乃釋教所說
羣有從一真起滅名爲生死隨其因報輪環各入諸
趣是也若非大和會不凝滯何以到窮理盡性之處
不以時刻之少多處所之喧靜情境之違順冥心息
念常存總持

夫道家法要氣爲元也調柔順適自覺氣之和禪家
法要性爲宗也空明洞徹自覺性之靈二法相符其
妙盡矣

多藏厚亡不如積而能散高位疾顛不如卑以自牧
是以古人有言富不如貧貴不如賤者識之深者也

內學之人但依道家流所說真人至人體純素之理
禪家流所說大乘上乘入空妙之法協用臻極誰窮
智力

修證儀中已說須具五緣予嘗思之尚未該備今自
立一說須具四緣第一具心緣深信樂欲此爲根本
其次具身緣無諸疾障事役其次具資緣有物足用
有人善奉其次具世緣運歷平寧是也最先由已次
第委命

予愛經教中所言棲心聖境冥心絕境安住妙境若
能知而密契語嘿一致其要備矣何假外求於人



P28-P29

予讀經得楞嚴圓通法門圓覺無礙法門維摩不二法門與夫誦其經而籍其數者異矣

學道者但得寐無夢而寤無憂譽不喜而毀不怒脞色空而如一卽動靜而皆如練此純深其道成矣

歸心聖境上有古先生藏事私庭下有隸子弟吾之慶幸灼然居多

圓覺經中敘普眼之觀重重是幻冲虛經中辯爭鹿之訟重重是夢是知卽今之我是幻也卽我之所是夢也見此大空已是真智猶名半智又此普眼章中言非幻不滅如老子云其精甚真此則不空若能洞

卓絕福德者下官實有恤緯之僭尋而晉高祖入洛予因思藝術之士亦如此言是知天時人事必以理道居先耳

維摩經疏中有說云文字般若謂名句文三者平顯般若故又圓覺道場修證儀中說修行初地得經論智予因自思好看佛書道書得意著文亦不失學法之巧慧爾

酷嗜於道淡乎無味之味也獨聞其和天然無聲之聲也有如此者名決定相

不與驕餌則免五鼎之烹不入智籠則免四隅之觸

古人高蹈肥遯其見如此若復別得妙道何以加焉
學僊至要無越於深根固蒂長生久視安養神氣自
求獨善之利學禪至要無越於定慧相合合而後明
化導生靈曲成兼濟之名其意則已備矣其言則無
窮也

予讀內外經典咸有所得讀法華經信入佛知見爲
大事所以依正覺觀其妙不使心昏迷讀周易信蒙
以養正爲聖功所以履正道晦其迹不求人見知協
用交濟何徃弗宜

內學之士智明而無爲行於正道者是也識暗而有
作行於邪道者非也大率如此法門樞要

澡雪靈明之心道可致也固存幻化之身道所寄也
牽制重複之緣道有累也於此觀練尤宜純熟
蒙以正功乃聖其直貫天必無愆應晦而明用乃靈
其照對物必無遁形我如是言亦不立名
今采經錄之語配爲四句諸幻盡滅覺心不動照體
獨立物我皆如法相及此吾道成矣

儒家燕居閒暇和舒顯放懷之容止禪家宴坐澄默
空寂晦入道之指歸理有淺深說難窮盡

道書言真人至人佛書言大乘最上乘者其理大同

小異若各執所說則難爲和會
凡一百八十一章

法藏碎金錄卷第八

